



Rakečanscy skupinarjo na wodženju po Ochranowskim pohrjebnišću
Foto: Alenka Hagerowa

Na wulět z awtami do Ochranowa podali su so minjenu sobotu člonojo Domowinskeje skupiny Komorow-Rakecy-Trupin. Fararka Erdmute Frank wodžeše nas po wustajeńcy Ochranowskeje wosady, po cyrkwi a po pohrjebnišću.

Jara nazornje rysuje wustajeńca stawizny Ochranowskeje wosady wot jeje spočatkow 1475 w Čechach a na Morawje. Nikolaus Ludwig Graf von Zinzendorf je we 18. lětstotku Ochranow tak zarjadował, kaž wón džensa hišće wobsteji. Jeho wowka Henriette Catharina von Gersdorff bě přeložowanje biblije do serbsčiny spěchowała. Wustajeńca hódnoći tež skutkowanje misionarow, mjez nimi serbskich. Džensa je Ochranow předewšěm znaty za swoje swětoznate hesła, přeložowane do 50 rěčow, tež do serbsčiny. Fararka Frank nam toho- runja zmóžni wopytać cyrkwinsku žurlu a rozjasni džensniše žiwjenje wosady. Na historiskim pohrjebnišću z lěta 1730 z dohromady 6 200 rownymi kamjenjami namakaš při hłownym puću tež row Zinzendorfa.

Po wobjedže wopytachmy manufakturu, w kotrejž zhotowjeja Ochranowske hwězdy. Při tym zhonichmy wjele wo jich stawiznach a do kotrych krajow je rozesyłaja. Dožiwichmy tež, kak tele hwězdy nastawaja. Alenka Hagerowa

wozjewjene w: **Serbski powěstnik**

Serbske nowiny 30.06.2015